

## ALC DI STORIC SUL COMUN DI SAN VÎT DAL TILIMENT

Lis lidrîs preistorichis di San Vît a son localizadis a soreli a mont dal atuâl centri storic: in chê zone a son vignûts fûr, in plui voltis, rescj dal mesolitic, dal neolitic e, soledut une impuartant necropoli databile ae civiltât paleovenite de prime etât dal fier, scuvierzude tal 1973.

Une vore ancje lis testimoneancis di epoche romane, che a rivin ae centuriazion deliniade dopo de fondazion di Julie Concuardie: tra lis plui grandis al reste il segnât de vie Julie: di Concuardie e puartave al Noric tocjant, te nestre zone, Savorgnan e Prodolon. La vie Auguste, altre strade romane di grande impuartance, e traversave il Tiliment propri ae altece di San Vît.

Ve duncje une pussibil justificazion dal toponim: il centri abitàt, grop stradâl di rilêf, dongje il vât sul Tiliment, al jere sot de protezion di San Vît, che sot i Otons il so cult al ve cetante difusion. Ae justificazion de Ete di Mieç e ven ancje contraponude la pussibile derivazion di Vic (vicus, vilaç), diventât pues dopo Vit e, in fin San Vît. I prins documents sigûrs però a rivin dal XII secul. Di chê volte la storie di San Vît e fo leade aes vicendis dal Patriarcje di Aquilee fin al 1762.

Dal periodi de Ete di Mieç no nus è rivade olme di normis statutariis. Ma al è sigûr che a San Vît si fos formât un sisteme consuetudinari, une regolamentazion de vite cotidiane soledut par chel che al rivuarde la economie e la justizie. Al tocjarà spietâ la sconfite patriarcjâl dal 1420 par vënt conferme. Inalore la republiche di Vignesie e acuardà ae Comunitât di San Vît nûf cjapitui, cognossûts ancje come Privilegium Comunitatis Sancti Viti, che cun chescj e ricognossè i dirits dal passât che e difindè ostinadementri cuintri i Patriarcjis che, daspò, a tentar in di esercitâ une forme di podê assolût.

Des diviersis edizions dai statûts di San Vît nus son rivâts fin cumò dome chê dal 1528, volude di Marino Grimani, e chê dal 1773, preparade dal ultin patriarcje Daniele Delfino, ma butade fûr de Serenissime. Il periodi patriarcjâl al delinià il svilup di San Vît seont la imagjin di cumò. La cente murade, il cjistiel, lis tors, l'ospedâl dai Batûts, lis diviersis Glesiis, il cjampanili, la place, il palaç patriarcjâl che nol è plui a àn disegnât in mût inconfondibil la strutture urbane cussì come il vescul Antonio Altan, Andrea Bellunello, Pomponio Amalteo, Gian Giacomo Arrigoni, Paolo Sarpi, Anton Lazzaro Moro a àn tramandât la imagjin culturâl de San Vît Patriarcjâl.

Dilunc il 800 San Vît al à mantignût il rûl di riferiment che lu distinguè tal passât: come numar di abitants al jere secont dome a Udin; la ativitât culturâl e cognossè moments di elevade intensitât grazie ae figure di Gherardo Freschi, patriot e inteletuâl di nivel

internazionâl, fondadôr de riviste "L'amî dal contadin".

---

## INDIÇ

### **TIT. I PRINCIPIS GJENERÂI E ELEMENTS COSTITUTÎFS DAL COMUN pag. 6**

Cjâf I - La comunitât, la autonomie, il statût pag. 7

Art. 1 - Il Comun

Art. 2 - Steme e confenon

Art. 3 - Teritori – Sede

Cjâf II - Ativitâts dal Comun pag. 8

Art. 4 - Il rûl

Art. 5 - Compits e funzions

Art. 6 - Cuadri pretori

### **TIT. II ORDENAMENT ISTITUZIONÂL DAL COMUN pag. 13**

Cjâf I - Orghins Istituzionâi pag. 14

Art. 7 - Normis gjenerâls

Cjâf II - Consei Comunâl pag. 14

Art. 8 - Elezion e composizion

Art. 9 - Durade in cjarie

Art. 10 - Conseîrs Comunâi

Art. 11 - Conseîr anzian

Art. 12 - Competencis dal Consei Comunâl

Art. 13 - Esercizi de potestât regolamentâr

Art. 14 - Grups Conseârs

Art. 15 - Comissions conseârs permanentis e di garanzie

Art. 16 - Comissions speciâls

Art. 17 - Commission pal regolament dal Consei Comunâl

Art. 18 - Sentadis dal Consei

Art. 19 - Convocazion dai conseîrs

Art. 20 - Intervent dai conseîrs pe validitât des sentadis

Art. 21 – Astension dai conseîrs

Art. 22 - Publicitât des sentadis

Art. 23 - Presidence des sentadis conseârs – compits dal President

Art. 23 bis - President dal Consei – incompatibilitât

Art. 23 ter - Revoche dal President dal Consei

Art. 24 - Votazion e funzionament dal Consei

Art. 25 - Verbalizazion

Art. 25 / bis – Publicitât spesis elettorâls

Cjâf III - Zonte Comunâl pag. 23

Art. 26 - Nomine de zonte

Art. 27 - Funzionament de zonte

Art. 28 - Durade in cjarie de zonte

Art. 29 - Mozion di sfiducie

Art. 30 - Revoche

Art. 31 - Competencis de Zonte

Art. 32 - Deliberazion di urgjence e daurman esecutive

Cjâf IV - Il Sindic pag. 27

Art. 33 - Rûl e funziions

Art. 34 - Podês dal Sindic

Art. 35 – Rapresentance e coordinament

Art. 36 - Il Vice Sindic

Art. 37 - Podês di ordenance

### **TIT. III ISTITÛTS DI PARTECIPAZION POPOLÂR pag. 31**

Cjâf I - La partecipazion dai citadins ae Aministrazion Comunâl pag. 32

Art. 38 - Partecipazion dai citadins

Art. 39 - Partecipazion al procediment Aministratîf

Art. 40 - Valorizazion des formis associativis e orghins di partecipazion

Art. 41 - Valorizazion dal Associazionisim economic

Art. 42 - Consultis comunâls

Cjâf II - La consultazion dai citadins e i referendums pag. 34

Art. 43 - Consultazion de popolazion

Art. 44 - Istancis, petizions, propuestis

Art. 45 - Azion popolâr

Art. 46 - Referendum

Cjâf III - Il dirit di acès e di informazion dal citadin pag. 37

Art. 47 - Dirit di acès e di informazion

Cjâf IV - Il difensôr civic pag. 37

Art. 48 - Istituzion

Art. 49 - Nomine

Art. 50 - Recuisîts e incompatibilitât

Art. 51 - Durade in cjarie, decjadence, revoche

Art. 52 - Sede indenitât

Art. 53 - Funziions

Art. 54 - Rapuarts cul Consei Comunâl

## **TIT. IV ORGANIZAZION DAI UFICIS E DAL PERSONÂL      pag. 40**

Art. 54 / bis - Individuazion politiche - amministrative: funzioms e responsabilitâts

Art. 55 - La organizazion gjenerâl

Art. 56 - Segretari Comunâl

Art. 57 - Il vice Segretari Comunâl

Art. 58 - Il personâl

Art. 59 - Personâl esterni

Art. 60 - Colaborazions esterni

Art. 61 - Incarics temporanis

Art. 62 - Incompatibilitât

Art. 63 - De responsabilitât amministrative e contabile

Art. 64 - Forme e tiermins pe espression dai parês

## **TIT. V ATTIVITÂT AMINISTRATIVE      pag. 45**

Cjâf I - Ativitât regolamentâr e deliberative      pag. 46

Art. 65 - Podê di iniziative

Art. 66 - Procediment amministratîf

Cjâf II - Servizis      pag. 47

Art. 67 - Servizis publics comunâi

Art. 68 - Gjestion dai servizis publics

Art. 69 - Aziendis speciâls e istituzionâls

Cjâf III Formis associativis e di cooperazion - Acuardis di program      pag. 49

Art. 70 - Convenzioms

Art. 71 - Consorzis

Art. 72 - Acuardis di program

## **TIT. VI FINANCE E CONTABILITÂT      pag. 50**

Art. 73 - Ordenament

Art. 74 - Ativitât finanziarie dal Comun

Art. 75 - Amministrazion dai bens comunâi

Art. 76 - Contabilitât comunâl: il Belanç

Art. 77 - Contabilitât comunâl: il Consuntîf

Art. 78 - Ativitât contratuâl

Art. 79 - Revision economiche - finanziarie

Art. 80 - Tesorarie

Art. 81 - Control economic de gjestion

Art. 82 - Partecipazion ae programazion

## **TIT. VII DISPOSIZIONS FINÂLS E TRANSITORIIS      pag. 56**

Art. 83 - Modificazions e abrogazion dal statût

Art. 84 - Jentrade in vore

---

## TITUL I

### PRINCIPIS GJENERÂI E ELEMENTS COSTITUTÎFS DAL COMUN

#### Cjâf I

#### LA COMUNITÂT, LA AUTONOMIE, IL STATÛT

#### Art. 1

#### IL COMUN

1. Il Comun di San Vît dal Tiliment al è ent locâl autonom tal cercin dai principis fissâts des leçs gjenerâls de Republiche, de Regjon Friûl Vignesie Julie e des normis dal presint Statût.
2. Il Comun di San Vît dal Tiliment al è part integrant de Comunitât Europeane e al concor ae promovion de culture de pâs e de solidarietât internazionâl e dai dirits umans.
3. Il Comun al è espression de comunitât locâl, le rapresente e int cure i interès. Par chest motîf al ten sù ancje libaris formis associativis, la lôr costituzion e il potenziament.
4. Il Comun al à une autonomie statutarie, normative, organizzative e aministrative, oltri che autonomie impositive e finanziarie te suaze dal statût, dai regolaments e des leçs di coordinament de finance publiche e al esercite funzions propriis tribuidis o delegadis.
5. Il Comun al promôf la discussion e il confront su lis istituzions e sui programs, oltri che su la gjestion dai servizis. Par chest motîf al prudele la partecipazion e consultazion de popolazion, al garantîs la pubblicitât dai ats de aministrazion comunâl e l'acès ai documents aministratîfs e al prudele l'acès aes struturis e ai servizis di bande dai citadins ancje in forme associate.
6. Il Comun al coordene la ativitât dai propriis orghins e struturis tes formis plui adatis par capî, tal lôr insieme, lis dibisugnis e i interès gjenerâi de Comunitât e al indrece il funzionament de proprie organizazion par che e proviodi a sodisfâju mantignint il principi de separazion dai rûi politics da chei aministratîfs.

Art. 2

## STEME E CONFENON

1. Il Comun al à, come segn distintîf, il steme ricognossût cun R. D. 05-7-1928, trascrit tal registri Araldic dal Archivi Centrâl dal Stât. **STEME:** Di ros, al cjistiel cun toratis di doi poçs di arint, viert, cun barcons e murât di neri, ae fasse pure di arint che e travierse dome il cjistiel, bordade di turchin e cjariade di une ramace di rôl al naturâl. Il scût al sarà furnît di ornamentals dal Comun.
2. Tes cerimoniis e tes altris publichis ricorencis, e ogni volte che si scugni rindi uficiâl la partecipazion dal Ent a une particolâr iniziative, il Sindic al pues disponi che al vegni esibît il confenon cul steme dal Comun.
3. Il Sindic al pues autorizâ l'ûs e la riproduzion dal steme dal Comun par fins no istituzionâi dome là che al existi un public interès.

Art. 3

## TERITORI - SEDE

1. Il Comun di San Vît dal Tiliment al comprend la part dal teritori nazionâl delimitât cul plan topografic dal art. 9 de leç dai 24 di Dicembar 1954 n. 1228, aprovât dal Istitût Centrâl di Statistiche. Oltri al Cjâf lûc, il Comun di San Vît dal Tiliment al comprend ancje lis fraziions di Prodolon, di Savorgnan, Gleris, Cjarbone, Ligugnane, Braide e Rose. Il Comun al à la sede tal palaç municipâl che si cjate tal Cjâf lûc di San Vît dal Tiliment dulà che di norme si dan dongje i orghins istituzionâi.

Cjâf II

## ATIVITÂTS DAL COMUN

Art. 4

## IL RÛL

1. Il Comun al è titolâr di funzions e podês propriis, esercitâts seont i principis e tai limits de Costituzion, des Leçs e dal Statût. Al esercite, ancje, seont lis leçs statâls e regionâls, lis funzions atribuidis o delegadis dal Stât e de Regjon seont il principi di sussidiarietà.
2. I spietin al Comun dutis lis funzions amministrativis che a rivuardin la popolazion e il teritori di competence, soreddut tai setôrs dai servizis sociâi, dal asset e de utilizazion dal teritori e dal svilup economic, salf che nol sedi espressementri atribuît a altris ents des leçs statâls o regionâls.
3. La ativitât amministrative dal Comun e perseguìs il fin dal presint Statût e e je improntade

a criteris di imparzialitât, eficiencie, eficacie e trasparenche.

4. Il Comun pal exercizi des propriis funzions e di chês delegadis al met in vore formis di cooperazion cun altris Comuns, cu la Provincie e/o cun altris Ents.

5. Il Comun al concor, in mût autonom, ae determinazion dai obietîfs contignûts tai plans e programs dal Stât e de Regjon e al proviôt, par chel di proprie competence, ae lôr specificazion e metode in vore.

6. Il Comun al perseguìs lis finalitâts e i principis de "Cjarte Europeane de autonomie locâl" adotade a Versailles tal 1954 dal Consei dai Comuns de Europe, dulà che la valorizazion des autonomiis teritoriâls e je colegade tal contest dal procès di unificazion de Europe. Par chest al opare par favorî i procès di integrazion politiche - istituzionâl de Comunitât Europeane come Europe dai popui cun formis di cooperazion, di scambis e di zimulaments, par contribuî ae pâs e ae justizie.

Art. 5

## COMPITS E FUNZIONI

1. Il Comun al gjestìs servizis propriis seont lis normis dal presint Statût.

2. Il Comun al gjestìs i servizis eletorâi, di anagrafe, di stât civîl, di statistiche e di coscrizion militâr. Lis funzions relativis a chescj servizis a son esercitadis dal Sindic come Uficiâl di Guvier.

3. Il Comun al esercite, anچه, altris funzions amministrativis par servizis di competence statâl che i vegnin affidadis de leç, a condizion che a vegnin siguradis lis cuvierturis finanziariis par chescj altris impegnis.

4. Il Comun si impegne a esercitâ lis funzions amministrativis che i vegnin delegadis de Regjon. Il Comun al ricognòs ae Regjon podês di indreçament, di coordinament e di control. Tal contest dai proviodiments regjonâi di deleghe a saran sigurâts i mieçs finanziariis pal exercizi de deleghe stesse.

5. In particolâr il Comun si impegne tai seguitîfs setôrs di ativitât:

### 1) TUTELE DE SALÛT E PROTEZION SOCIÂL

Il Comun al concor tal garantî, tal cercin des sôs competencis, il dirit ae vite e ae salût; al met in vore i struments adats par fâlu, cun particolâr riuart al ambient, ai lûcs di lavôr, ae tutele de maternitât e de infanzie; al opare pe atuazion di un eficaç servizi di assistance, cun particolâr riferiment ae famee, ai anzians, ai minôrs, ai pidimentâts e ai invalits e al concor a realizâ e gjestî strutturis di bon acet e di assistance pai forescj esui, emigrants e rifugjâts politics.

### 2) TUTELE DAL PATRIMONI NATURÂL, STORIC, LINGUISTIC, ARTISTIC, ARCHEOLOGJIC E AMBIENTÂL.

1. Il Comun al met in vore lis misuris necessariis a conservâ e difindi l'ambient metint in vore plans pe difese de tiere, dal sot de tiere, dal aiar, de aghe, des plantis e de faune e par eliminâ ogni cause di pussibil incuinament. Al tutele e al valorize il patrimoni storic, artistic, archeologic e ambientâl garantint la gjonde de bande de coletivitât

2. Il Comun si impegne a permeti e a valorizâ l'ûs de lenghe furlane in ogni contest tai limits previodûts de Costituzion e des altris normis juridichis sore elencadis e chês dal presint Statût.

### 3) PROMOZION DAI BENS CULTURÂI, DAL SPORT E DAL TIMP LIBAR.

Il Comun al promôf la tutele e la valorizazion dal patrimoni culturâl, metint sù dutis lis sôs ativitâts, lis misuris necessariis ae cognossince e valorizazion dai bens culturâl ancje tal lôr contest ambientâl cui servizis essenziâi de Biblioteche e dal museu de citât.

Al promôf e al prudele lis ativitâts sportivis di diletants e il turisim sociâl e zovanîl, ancje cul ûs des struturis, dai servizis e implants che al sarà disciplinât cuntun regolament a pueste.

### 4) ASSET E ÛS DAL TERRITORI.

a) Il Comun al promôf e al met in vore un organic asset dal teritori, tal quadri di un programât svilup dai insediaments umans, des infrastruturis sociâls, des ativitâts agriculis e dai implants industriâi, turistics e comerciâi creant un rapuart ecuibrât cul ambient naturâl.

b) Al promôf e al realize plans di svilup de edilizie residenziâl publiche e private, par sigurâ il dirit ae cjase.

c) Al predispon la realizazion di oparis di urbanizazion, seont lis esigjencis e lis prioritâts definidis tai programs a pueste.

d) Al met in opare un sisteme coordinât di trafic e di circolazion, adeguât ai dibisugns di spostâsi de popolazion, cun particolâr riuart aes esigjencis lavorativis, scolastichis e dai servizis in gjenar.

e) Al predispon struments adats di protezion civîl, di podê usâ in câs di publichis calamitâts.

### 5) SVILUP ECONOMIC.

1) Il Comun al tutele e al promôf il svilup des ativitâts economicis pe promozion sociâl dal om garantint la dignitât dai lavoradôrs cun particolâr atenzion ae agriculture, ae industrie, al artesanât, ai servizis.

2) Il Comun, in colaborazion ancje cui Comuns confinants e altris istituzions:

a) al coordene lis ativitâts comerciâls e al favorîs la organizazion razionâl dal aparât distributîf;

b) al promôf programs ats a favorî il svilup dal terziari avanzât par stimolâ la cualificazion professionâl e la ocupazion zovanîl;

c) al favorîs cu la planificazion e la promozion, ancje in formis consorziâl, iniziativis



industriâls;

d) al sosten il disvilup de agriculture te suaze di un ordenât asset dal teritori;

e) al favorîs cun iniziativis culturâls e artistichis il svilup dal turisim stimolant il rinovament e la modernizazion dai strument e dai servizis;

f) al prudele e al sosten l' associazionisim, la cooperazion e lis formis di autogjestion tra i lavoradôrs.

## 6) PROGRAMAZION ECONOMICHE - SOCIÂL E TERITORIÂL.

1) Stant a ce che al dispon l' art. 5, comis 2, 3, 4 e 5 dal T. U. Ordenament EE. LL. n. 267/2000, il Comun al realize lis propriis finalitâts metint in opare il metodi e i strument de programazion.

2) Par concori ae determinazion dai obietîfs dai plans e programs dal Stât e de Regjon, il Comun al proviôt a vê, par ogni obietîf, il jutori dai sindacâts, des formazions sociâls, economicjis e culturâls che a operin tal so teritori.

## 7) SERVIZIS PUBLICS.

Il Comun, pe gjestion dai servizis, che pe lôr nature e dimension no puedin sei davuelts diretomentri, al pues disponi:

a) la costituzion di aziendis speciâls;

b) la partecipazion a consorzis o a societâts par azions;

c) la stipulazion di convenzions a pueste cun altris comuns interessâts ae gjestion dal servizis;

d) la concession a tierçs;

e) une istituzion a pueste pal exercizi di servizis sociâi, no vint relevance imprenditoriâl.

## 8) PROMOZION DES PÂR OPORTUNITÂTS

Il Comun al promôf ogni iniziative dreçade al svilup des pâr oportunitâts tra om e femine in ducj i cjamps dal vivi sociâl ançe par chel che al rivuarde i orghins istituzionâi.

Art. 6

## CUADRI PRETORI

1. Il Comun al à un quadri pretori pe publicazion des deliberazions, des ordenancis, dai manifestcj e dai ats che a àn di sei quartâts a cognossince dal public.

2. Un dipendent dal Comun al vignarà nomenât responsabil des publicazions.

3. Dutis lis deliberazions a son metudis sul quadri pretori seont lis specifichis dispozions de leç.

4. Il Comun al podarà vê un propri "servizi stampe" par dâ une publicitât plui grande ae ativitât aministrative.

5. Il Comun al cjate fûr un o plui lûcs pe esposizion publiche e gratuite di materiâl informatîf a disposizion des associazions. Il regolament al determine lis modalitâts di atuazion dal servizi.

## **TITUL II**

### **ORDENAMENT ISTITUZIONÂL DAL COMUN**

#### Cjâf I

#### **ORGHINS ISTITUZIONÂI**

##### Art. 7

#### **NORMIS GJENERÂLS**

1. A son orghins di guvier dal Comun il Consei comunâl, la Zonte e il Sindic.
2. I spiete ai orghins di guvier la funzion di rapresentance democratiche de Comunitât e la realizazion dai principis e des competencis stabilidis dal statût tai limits de leç.
3. La leç e il statût a regolin la atribuzion des funzions e i rapuarts tra i orghins, par realizâ une eficiente e efficace forme di guvier de coletivitât comunâl.

#### Cjâf II

#### **CONSEI COMUNÂL**

##### Art. 8

#### **ELEZION E COMPOSIZION**

1. Il Consei Comunâl al è l'orghin che al pant e al esercite la rapresentance direte de Comunitât, che lu à elet.
2. Lis normis relativis ae composizion, ae elezion, aes causis di no eleibilitât e di no compatibilitât dai conseîrs a son stabilidis de leç.

Art. 9

## DURADE IN CJARIE

1. La durade in cjarie dal Consei e je stabilide de leç.
2. Il Consei al reste in cjarie fin ae elezion dal gnûf, limitantsi, daspò de publicazion dal decret di clamade dai comizis elettorâi, a meti in vore i ats urgjents e improrogabii.

Art. 10

## CONSEÎRS COMUNÂI

1. I conseîrs comunâi a rapresentin l'intîr Comun cence vincu di mandât.
2. I conseîrs a jentrin in cjarie al at de proclamazion ven a stâi, in câs di sostituzion, a pene che il Consei al cjape sù la relative deliberazion.
3. Te sentade subit dopo des elezions il Consei, prin di deliberâ su cualsisei altri ogjet, al à di proviodi ae convalide dai conseîrs elets e di declarâ la no eleibilitât o la no compatibilitât di lôr, cuant che a esistin des causis previodudis de leç, proviodint ae lôr sostituzion. La iscrizion al ordin dal di de convalide dai elets e cjape dentri, ancje se nol è dit in maniere clare, la sostituzion di chei che no si puedin elei e l'inviamet dal procediment pe decadence dai no compatibii. Te stesse sentade si proviôt ae sostituzion di eventuai conseîrs che a vedin presentât lis dimissions daspò de proclamazion e prime de convalide.
4. La posizion juridiche dai conseîrs e je regolade de leç.
5. I conseîrs, finide la incarghe par efiet dal dissioziment dal Consei, a continuin a esercitâ lis incarghis esternis, a lôr eventualmentri dadis, fin ae nomine dai sucessôrs.
6. Lis dimissions di un Conseîr Comunâl no si puedin revocâ, no àn bisugne di cjapade di at e a son daurman eficaciis. Ae sostituzion il Consei Comunâl al proviôt dentri e no dopo dai 10 dîs.
7. I Conseîrs a àn dirit di otignî dai uficis comunâi, oltri che des aziendis dal Comun e dai Ents a lui dipendents, dutis lis notiziis e lis informazions che a àn se a son utilis al davuelziment dal lôr mandât. Lôr a son tignûts al segret tai câs stabilîts de leç.
8. L'esercizi dal dirit dal come precedent al è dissiplinât cuntun regolament a pueste.
9. Il Conseîr che al mancje a trê sentadis seguitivis dal Consei cence vê dade une justificazion scrite al decjât de cjarie. Par chest il President dal Consei al domande ai Conseîrs di presentâ justificazion scrite dentri dai 20 dîs dal riceviment de richieste. In difiet i relatîfs ats, daspò la valutazion de Conference dai Cjâf Grups, che e podarà domandâ clariments o elements integratîfs, a son rimetûts al Consei che, dentri di 60 dîs dal inviamet dal procediment, al varà di pronunciâsi in vie definitive sul acetâ lis

justificazions o declarâ la decjadence de cjarie.

10. I conseîrs a àn drit di iniziative su lis materiis di competence dal Consei. A àn, ancje, drit di formulâ interrogazions, interpelancis e mozions e presentâ ordins dal di rispjetant lis proceduris stabilidis dal Regolament dal Consei comunâl.

11. Lis indenitâts, onoraris e rimbors spesis spietant ai Conseîrs pal esercizi des lôr funzions a son stabilidis dentri i limits de leç.

12. Il Comun al sigure la assistance in sede processuâl ai Conseîrs, ai Assessôrs e al Sindic pai fats e ats leâts al davuelziment des lôr funzions in ogni stât e grât di judizi, simpri che nol esisti un conflit di interès cul Comun stes.

Art. 11

## CONSEÎR ANZIAN

1. Conseîr Anzian al è il conseîr che al à cjàpât aes elezions la cifre elettorâl plui alte (vôts di liste plui vôts di preference).

Art. 12

## COMPETENCIS DAL CONSEI COMUNÂL

1. Il Consei al è l'orghin di indreçament e di control politic – amministratîf.

2. Il Consei Comunâl al à competence dome pe adozion dai ats stabilîts dal secont come dal art. 42 de T.U. Ordenament EE.L. 267/2000, esercitant cun chescj lis funzions fundamentâls pe organizazion e il svilup de comunitât e al determine i indreçaments de politiche amministrative dal Ent.

A son di competence dal Consei Comunâl ancje i ats e i proviodiments a lui dâts par altris disposizions dal soredit Test Unic e di altris leçs statâls e regionâls.

3. Lis deliberazions che a rivuardin i ats di competence dal Consei Comunâl no puedin jessi metûts in opare di urgence di altris orghins dal Comun, fale chei che a rivuardin lis variazions di belanç che a àn di sei sotponûts a ratifiche dal Consei tai sessante dîs seguitîfs par che no decjadin.

4. Ogni propueste di deliberazion sotponude al Consei e à di sei furnide dai parês come al T.U. Ordenament EE.L.L. n. 267/2000. I parês a van metûts dentri la delibere cuntune citazion tra lis jentradis dal at di deliberâ.

5. Il Consei al da i indreçaments di caratar gjenerâl, adats a permeti il davuelziment eficaç des funzions di coordinament dai servizis, dai oraris di viertidure al public dai uficis periferics des amministrazions publichis par armonizâ l'ûs dai servizis aes esigjencis

complessivis e gjenerâls dai utents.

Art. 13

#### ESERCIZI DE POTESTÂT REGOLAMENTÂR

1. Il Consei comunâl, te potestât regolamentâr, al met in vore, tal rispiet de leç e dal presint Statût, regolaments proponûts de zonte pe organizazion e il funzionament des istituzions, pal funzionament dai orghins e pal esercizi des funzions.
2. I regolaments, une volte esecutive la delibere che ju à aprovâts, a son metûts fûr tal cuadri pretori par 15 dîs seguitîfs e a jentrin in vore daspò cheste publicazion.
3. I regolaments, declarâts urgjents dal Consei comunâl in sede di aprovazion, a jentrin in vore la zornade seguitive ae metode fûr tal cuadri pretori.

Art. 14

#### GRUPS CONSEÂRS

1. I Conseîrs elets te midiesime liste a formin un grup conseâr. Se intune liste al è stât elet dome un Conseâr, a chest a son ricognossudis la rapresentance e lis prerogativis che i spietin a un grup conseâr.
2. Ogni grup al comuniche al President dal Consei il non dal Cjâf grup drenti de zornade precedente la prime riunion dal Consei a pene elet. In mancjance di cheste comunicazion al ven considerât Cjâf grup il plui anzian dal grup, seont il presint statût.
3. Il President dal Consei, tal esercizi des funzions di President des adunancis conseârs, al à di avalêsi de conference dai Cjâfs grup pe programazion des riunions e par sigurâ il davuelziment dai lavôrs dal Consei.
4. Il regolament al definìs lis altris competencis de conference dai Cjâfs grup, lis normis pal so funzionament e i rapuarts cul President dal Consei, che le presiêt, lis Comissions Conseârs permanentis, il Sindic e la Zonte Comunâl.
5. Il Candidât a Sindic, presentât di plui listis e elet Conseâr Comunâl, al pues formâ un grup autonom.
6. I Grups Conseârs a disponin di spazis e mieçs pal davuelziment des lôr funzions istituzionâls.

Art. 15

#### COMISSIONS CONSEÂRS PERMANENTIS

## E DI GARANZIE

1. Il Consei, al inizi di ogni gnove aministrazion, al pues istituî al so interni des Comissions permanentis, dulà che il numar dai components al sarà in proporzion ai vôts cjapâts. Lis comissions a davuelzin ativitât consultive e di preparazion su ats e materiis di sotponi al Consei comunâl.
2. Lis modalitâts pe convocazion, il vôt, lis normis di composizion e di funzionament des Comissions conseârs e di chês speciâls come al seguitîf art. 16 a son stabilidis dal Regolament dal Consei comunâl.
3. Il Sindic, i Assessôrs, il President dal Consei e i cjâfs grup a puedin partecipâ ai lavôrs des Comissions, cence dirit di vôt.
4. Se a vegnin constituidis Comissions Conseârs vint funzions di control o di garanzie, la presidence des stessis e spiete di dirit aes oposizions.

### Art. 16

## COMISSIONS SPECIÂLS

1. Il Consei comunâl al pues istituî Comissions speciâls, pal studi, la valutazion e la impostazion di intervents, projets e plans di particolâr relevance, o ben incaricâ di fâ aciertaments su fats, ats, proviodiments e compuartaments tignûts dai components dai orghins di guvier e dai dirigjents comunâi.
2. Tal proviodiment di istituzion al ven stabilît l'ogjet de incarghe, il numar dai membris e il tiermin li che la Comission e à di riferî al Consei par che al puedi esprimi un parê al rivuart.
3. Des Comissions a fasin part rapresentants indicâts dai grups conseârs.
4. La Comission e à ducj i podês che a coventin par quartâ indenant la incarghe, seont lis modalitâts previodudis dal regolament.

### Art. 17

## COMISSION PAL REGOLAMENT DAL CONSEI

1. La Comission pal regolament dal Consei comunâl e je costituide dai Cjâfs grup conseârs, e dure in cjarie pe interie durade dal Consei e e je presiedude dal President dal Consei.
2. Oltri al compit de formazion dal Regolament, e à ancje chel di curânt l'inzornament, esaminant lis propuestis dai conseârs in ordin aes modificazions e zontis di quartâi e sotponintlu, cun propri parê, al vôt dal Consei.
3. Il Consei al approve a maiorance assolude dai conseârs assegnâts al Comun e a scrutini

aviert, il propri regolament e lis modificaziuns.

Art. 18

#### SENTADIS DAL CONSEI

1. La ativitât dal Consei Comunâl si davuelç in session ordenarie o straordenarie.
2. Pe convocazion, a son consideradis ordenariis lis sentadis dulà che a vegnin iscritis lis propuestis di deliberis rivuardant la aprovazion dal bilanç di prevision e dal rindicont de gjestion.
  1. Lis sessions ordenariis a àn di sei convocadis almancul 5 dîs prin de zornade stabilide, chês straordenariis almancul 3. In câs di ecezionâls urgjence, la convocazion e pues vignî cuntun avîs di almancul 24 oris.
  2. La convocazion dal Consei e l'ordin dal dì dai arguments di tratâ e je fate dal President dal Consei sintût il Sindic. Il President al e tignût a convocâ il Consei dentri dai 20 dîs de richieste se sotscriete di almancul un cuint dai Conseîrs o dal Sindic.
  3. La integrazion dal ordin dal dì cun altris arguments di tratâsi in zonte a chei de convocazion e je sotponude aes midiesimis condizions dal precedent come 3 e e pues sei fate almancul 24 oris prin de zornade de convocazion de sentade.
  4. L'elenc dai arguments di tratâ al à di sei metût sul cuadri pretori almancul dentri de zornade prin di chês stabilide pe prime adunance e e à di sei fate une adeguade publicitât par permeti la plui alte partecipazion di citadins.
  5. La documentazion relative aes praticis di tratâ e à di sei metude a disposizion dai Conseîrs Comunâi insiemit ae convocazion.
  6. Lis sentadis dal Consei a son publichis, fale i câs previodûts dal regolament conseâr che int discipline il funzionament.

Art. 19

#### CONVOCAZION DAI CONSEÎRS

1. Il President dal Consei, o in sô assence il Conseâr Anzian, al convoche i Conseîrs cuntun avîs scrit di consegnâ a domicili.
2. La consegne e à di risultâ de declarazion dal mes comunâl.
3. La prime sentade dal Consei Comunâl e je convocate e presiedude dal Sindic fin aes eleziuns dal President de Assemblee. La prime sentade e à di jessi convocate dentri il tiermin perentori di 10 dîs de proclamazion e e à di tignîsi dentri il tiermin di 10 dîs de convocazion.

Art. 20

#### INTERVENT DAI CONSEÎRS PE VALIDITÂT DES SENTADIS

1. Pe validitât des sentadis e je necessarie la presince di almancul la metât dal numar dai conseîrs assegnâts al Comun. I astignûts presints in aule si zontin al “quorum” par rindi valide la sentade
2. Cuant che la prime convocazion e sedi lade deserte no jessint rivâts al numar dai presints come dal precedent come, ae seconde convocazion, che e varà lûc intune altre zornade, lis deliberazions a son validis se a intervegnin almancul 7 Conseîrs oltri al Sindic.
3. Ancje pes sentadis di seconde convocazion e je necessarie la presince di almancul la metât dal numar dai conseîrs destinâts al Comun pe aprovazion dai seguitîfs argoments:
  - a) balançs preventîfs e consuntîfs
  - b) regolaments
  - c) plans urbanistics gjenerâi
  - d) assunzion di mutuis

Art. 21

#### ASTENSION DAI CONSEÎRS

1. I conseîrs a àn di astignîsi di cjapâ part ae discussion e ae votazion di delibaris che a rivuardin interès propriis o di lôr parincj naturâi o par leç fin al 4 grât. L’oblic di astension no si apliche ai proviodiments normatîfs o di caratar gjenerâl, come i plans urbanistics fale tai câs dulà che al esisti une relazion imediade e direte tra il contignût de deliberazion e specifics interès dal Aministradôr o parincj ancje par leç fin al 4 grât
2. No a àn di cjapâ part diretementi o indiretementi in servizis, esazions di dirits, soministrazions o apalts di oparis tal interès dal Comun o dai Ents sogjets ae lôr aministrazion o vigilance.
3. La improibizion tratade al come 1 al compuarte l’oblic di slontanâsi de sale de adunance dilunc la tratazion di chescj afârs.
4. Lis disposizions dal presint articul si aplichin ancje al Segretari comunâl e ai dependents sorestants ae direzion des unitâts organizativis e dai servizis.

Art. 22

#### PUBLICITÂT DES SENTADIS

1. Lis sentadis dal Consei a son publichis, salv i câs dulà che, seont il regolament, a àn di jessi segretis.

Art. 23



## PRESIDENCE DES SENTADIS CONSEÂRS – COMPITS DAL PRESIDENT

1. Il Consei comunâl al è presiedût dal President dal Consei che al ven elet te prime sentade subit dopo de convalide dai elets, a scrutini segret e a maiorance assolude dai Conseîrs assegnâts; daspò de seconde votazion al baste la maiorance relative dai vôts esprimûts. In sô assence o impediment la presidence e ven cjapade dal Conseîr Anzian presint tal Consei.
2. Il President al rapresente l'intîr Consei Comunâl, int tutele la dignitât dal rûl e al sigure l'esercizi des funzions dadis al stes de leç e dal statût. Al dirêç i lavôrs cirint di sei imparziâl, tutelant lis prerogativis dai Conseîrs e garantint l'esercizi des lôr funzions.
3. Chel che al presiêt la adunance dal Consei al è investît dal podê discrezionâl par mantignî l'ordin, la osservance des leçs, dai regolaments e la regolaritât des discussions e des deliberazions.
4. Al à la facultât di suspindi e, par motîfs justificâts, di dissolzi la adunance.
5. Al pues tes sentadis publichis, daspò vê dât i avertiments dal câs, ordenâ che al vegni mandât vie chel che tal public al cause disordin.
6. Il President al sigure une adeguate e preventive informazion ai Grups Conseârs e ai singui Conseîrs su lis cuestions sotponudis al Consei.
7. Il President al ricêf lis interrogazions e lis mozions di discuti in Consei Comunâl e al viôt che aes interrogazions e vegni dade une rispueste dentri di trente dîs, cu lis modalitâts previodudis dal Regolament dal Consei Comunâl.
8. Al convoche e al presiêt la conference dai cjâfs grup.

ART. 23 bis (\*)

## PRESIDENT DAL CONSEI - INCOMPATIBILITÂT

1. La cjarie di President dal Consei Comunâl no si pues somâ ae cjarie di assessôr e a chê di cjâf grup.
2. Al President dal Consei no pues sei conferide, di bande dal Sindic, la deleghe a rapresentâlu pe tratazion di determinâts afârs che a rientrin te sô competence.

(\*) inserît cun deliberazion di C.C. n. 3 dal 06 di Fevrâr dal 2006

ART. 23 ter (\*)

## REVOCHE DAL PRESIDENT DAL CONSEI

- 1 Il President al reste in cjarie par dute la durade dal Consei Comunâl. Oltri che par dimissions voluntariis, al dismet de sô incarghe in câs di impediment permanent o par revoche.
- 2 La propueste di revoche e à di jessi motivade e sotscribe di almancul doi cuints dai Conseîrs assegnâts.
- 3 La propueste di revoche e ven metude in discussion no prime di dîs dîs e purpûr no plui di trente dîs dopo la sô presentazion.
- 4 Il Conseîr Anzian al convoche e al presiêt la sentade dulà che e ven discutate la propueste di revoche.
- 5 La propueste di revoche e je aprovade se e oten il vôt favorevul dai trê cuints dai conseîrs assegnâts.

6 Il President dal Consei Comunâl al pues jessi revocât dome se, tal davuelzi la proprie funzion, al mantegni un compartament che al pregiudichi in maniere grave il coret esercizi de sô funzion.

(\*) inserît cun deliberazion di C.C. n. 3 dal 06 di Fevrâr dal 2006

Art. 24

#### VOTAZIONS E FUNZIONAMENT DAL CONSEI

1. Lis deliberazions no valin se no vegnin adotadis intune sentade valide e cu la maiorance dai votants, salf i câs dulà che la leç o il presint Statût a previodin une divierse maiorance.
2. Lis votazions a son di norme aviertis. Lis votazions cun vôt segret a son limitadis ai câs previodûts dal Regolament dulà che a son stabilidis lis modalitâts par dutis lis votazions.
3. Lis schedis blancjis, chês che no si rivin a lei e chês che no valin si contin par determinâ la maiorance dai votants.
4. Lis votazions a son fatis cun vôt limitât se e je obligatorie la nomine di rapresentants de minorance. Cul regolament di funzionament dal Consei int saran disciplinadis lis modalitâts. A paritât di vôts al ven elet il plui vecjo.
5. In rapresentance de minorance, pal numar che i spiete, a son proclamâts elets i designâts de minorance stesse che te votazion come dal precedent come a àn ripuartât plui vôts. A paritât di vôts al ven elet il plui vecjo.

Art. 25

#### VERBALIZAZION

1. Il Segretari comunâl al cure, valintsi dai uficis e dal personâl dal ent, la verbalizazion des sentadis: tal câs che il segretari al fos obleât a no partecipâ, al è sostituît di un conseîr nomenât dal president. I verbâi a son sotscrits dal president e dal segretari comunâl. Tal câs di assence o di impediment il Segretari al è sostituît dal Vice Segretari.
2. I intervents e lis declarazions fatis dai conseîrs dilunc la discussion a son regjistradis e conservadis su supuart magnetic.
3. Cuant che i interessâts a 'nt fasin domande al President, i lôr intervents a son ripuartâts par intîr a verbâl, simpri che il relatîf test scrit al sedi fat pervignî al Segretari subit dopo la leture al Consei.
4. Eventuâls declarazions di vôt sui singui proviodiments a saran ripuartâts in struc tal test des relativis deliberazions.
5. I regjistris dai verbâi dal Consei e i supuarts magneticis des discussions a son depositâts

tal archivi comunâl a opere dal Segretari Comunâl che al previodarà, se jal domandin a fâ des copiis e certificazions dai stes.

Art 25 BIS

## PUBLICITÂT SPESIS ELETORÂLS

Cul regolament pal funzionament dal Consei Comunâl a saran stabilidis lis modalitâts di presentazion, une volte depositadis lis listis e lis candidaturis, de declarazion sul limit massim di spese previodût pe campagne eletorâl dal Sindic e de liste dai Conseîrs.

Cjâf III

## ZONTE COMUNÂL

Art. 26

### NOMINE DE ZONTE

1. La Zonte comunâl e colabore cul Sindic inte aministrazion dal Comun e si esprim cun deliberazions colegjâls.
2. La Zonte comunâl e je componude dal Sindic, che la presiêt, e cun no plui di 7 assessôrs.
3. Il Sindic al nomine i assessôrs ancje al di fûr dai components dal Consei, fra i citadins che a àn i requisîts par podê candidâsi, di sei compatibii e di podê sei elets ae cjarie di conseîr comunâl.  
I assessôrs no conseîrs comunâi a partecipin aes sentadis dal Consei cun dirit di peraule, ma cence dirit di vôt.
4. Il Sindic al da comunicazion de nomine al Consei te prime sentade seguitive aes elezions, o pûr te prime sentade seguitive ae nomine tal câs di sostituzion di assessôrs.
5. Il Consei comunâl al passe al aciertament des condizions di eleibilitât e di compatibilitât dai assessôrs te sentade dulà che il Sindic al fâs la previodude comunicazion.
6. No puedin fa part de Zonte la femine o l'om, i assedents, i dissedents, i parincj naturâi e par leç fin al tierç grât dal Sindic. I stes no puedin sei nomenâts rapresentants dal Comun.

Art. 27

### FUNZIONAMENT DE ZONTE

1. La Zonte e je convocate dal Sindic, che al stabilis i ogjets dal ordin dal dì de sentade.
2. Il Sindic al dirêç e al coordene la ativitât de Zonte e al sigure la unitât dal indreçament

politic amministratîf, fermis restant lis assegnazions e lis responsabilitâts dai singui assessôrs.

3. La Zonte e delibare cul intervent di almancul la metât dai siei components e a maiorange assolude dai presints. In câs di paritât al prevâl il vôt dal President.

4. In câs di assence o impediment dal Sindic al presiêt il Vice Sindic o, in câs di sô assence, l'assessôr anzian. La anzianitât tra i assessôrs e je determinade de etât.

Art. 28

#### DURADE IN CJARIE DE ZONTE

1. La Zonte e reste in cjarie fin al insediament de gnove Zonte e dal gnûf Sindic.

2. Il Sindic al pues revocâ un o plui assessôrs, dantint motivade comunicazion al Consei.

3. In câs di dimissions, impediment permanent, rimozion, decjadence o decès dal Sindic, la Zonte e cole e si procêt al dissiozziment dal Consei. In chest câs la Zonte e reste in cjarie fin ae elezion dal gnûf Consei e dal gnûf Sindic.

4. Il dissiozziment dal Consei comunâl al determine in ogni câs il decjadi de Zonte, oltri che dal Sindic.

Art. 29

#### MOZION DI SFIDUCIE

1. Il vôt dal Consei comunâl contrari ae propueste dal Sindic e de rispetteve Zonte nol compuarte lis dimissions dai stes. Il Sindic e la Zonte a dismetin de cjarie se e ven aprovade une mozion di sfiducie votade par clamade nominâl de maiorange assolude dai components dal Consei. La mozion di sfiducie e à di sei motivade e sotscribe di almancul doi cuints dai conseîrs assegnâts, cence contâ in chest câs il Sindic, e e ven metude in discussion no prime di dîs dîs e no dopo i trente dîs de sô presentazion.

Art. 30

#### REVOCHE

Il Sindic al pues revocâ un o plui assessôrs dantint motivade comunicazion al Consei Comunâl te sô prime adunance.

Art. 31

## COMPETENCIS DE ZONTE

1. La Zonte e puarte indenant i ats di aministrazion che no sedin riservâts de leç al Consei e che no rientredin tes competencis, previodudis de leç e dal Statût, dal Sindic, dai orghins di decentrament, dal segretari o dai funzionaris dirigjents, e colabore cul Sindic pe metode in opare dai indreçaments gjenerâi dal Consei, e riferîs ogni an al Consei su la proprie ativitât e e davuelç ativitâts di propueste e di impuls tai confronts dal stes.

2. I assessôrs a concorin cu lis lôr propuestis e il lôr vôt al exercizi de podestât colegjâl de Zonte, a esercitin, pe deleghe dal Sindic, lis funzions di soreintindi al funzionament dai servizis e dai uficis e ae esecuzion dai ats, oltri che al servizi di competence statâl, tal cercin des areis e dai setôrs di ativitât in maniere specifiche definîts te sorescrite deleghe. La deleghe e da al delegât lis responsabilitâts leadis aes funzions che la stes e da e e pues sei revocade dal Sindic in cualsisei moment.

3. Tal contest dai ats di aministrazion dâts de leç ae competence de Zonte Comunâl i spiete a cheste deliberâ, tra l'altri:

- a) la aprovazion dai projets di oparis publichis viôt la leç 109 / 94 e lis relativis periziis che a compuartin aument de spese dal progjet origjinari e la nomine dal colaudatôr aministratîf;
- b) la nomine dai professioniscj esternis pe projetazion e direzion dai lavôrs di opare publiche;
- c) lis concessions in ûs dai bens demaniâi e patrimoniâi di durade mancul di nûf agns;
- d) lis locazions ativis e passivis;
- e) la acetazion o il dinei di lassits o donazions di bens mobii, lis servitûts di ogni gjenar e tip, lis transazions, ogni altri contrat che la leç no destini ae competence dal Consei Comunâl;
- f) i contrats di prestazion di opare inteletuâl di alte professionalitât;
- g) lis variacions e i adeguaments des tarifis pe fruizion di bens e servizis;
- h) i prelêfs dal Font di Riserve;
- i) la promovion des azions e dai ricors aministratîfs e jurisdictionâi di proponi al Comun o proponûts cuintri il Comun denant al President de Republiche, a autoritâts aministrativis, ai judiçs, ordenaris o speciâi, di ogni ordin e grât, comprendudis lis transazions che no impegnin il belanç dal Comun pai exercizis seguitîfs, la nomine dal legâl;
- l) i ats in materie di toponomastiche;
- m) i trasferiments imobiliârs che rientrin te ordenarie aministrazion, come alienazions di relits stradâi, alienazions, acuiscj, permutis pe retifiche di confins, acuiscj par miorâ la funzionalitât di bens demaniâi e patrimoniâi.

4. I spiete ae Zonte Comunâl deliberâ ancje su indreçaments, criteris e eventuâi limits che i responsabii a àn di mantignî tal exercizi des atribuzions lôr dadis des leçs, dal Statût e dai regolaments.

Art. 32

## DELIBERAZIONS DI URGJENCE DI ESEGUÎ DAURMAN

1. La Zonte e pues, in câs di urgjence, sot la proprie responsabilitât, cjapâ deliberazions che

a rivuardin lis variazioms di belanç.

2. Lis deliberazioms soreddis a son di sotponi a ratifiche dal Consei tai sessante dîs seguitîfs, par che no decjadin.

3. Il Consei, se al dinee la retifiche o al modifichis la deliberazion de Zonte, al cjape i necessariis proviodiments tai rivuarts dai rapuarts juridics che a podaressin nassi su la fonde des deliberazioms no ratificadis o modificadis.

4. Lis deliberazioms de Zonte a puedin sei declaradis di eseguî daurman cul vôt dât de maiorance dai components.

Cjâf IV

IL SINDIC

Art. 33

RÛL E FUNZIONI

1. Il Sindic, tes funzioms di cjâf de amministrazion comunâl, al rapresente la Comunitât e al promôf cul jutori dai orghins colegjâi e de organizazion dal Comun lis iniziativis e i intervents plui adats par realizâ lis funzioms e i principis fissâts cul presint Statût.

2. Il Sindic, come "difensôr ideâl" al ven nomenât tutôr dai dirits cun particolâr riferiment a chei dai plui debui: minôrs, handicapâts, malâts, anzians, imigrâts.

3. Al convoche e al presiêt la Zonte.

4. Come President de Zonte comunâl int al pant la unitât di indreçament politic e aministratîf, promovint e coordinant la ativitât dai Assessôrs, par razunzi i fins stabilîts tal document programatic. In particolâr:

a) al dâ ai assessôrs lis diretivis politichis e aministrativis par meti in vore i indreçaments e i ats fundamentâi dal Consei e dai proviodiments gjenerâi de zonte di deliberâ oltri che di chês leadis aes propriis responsabilitâts di direzion gjenerâl de ativitât di guvier e propositivis de zonte;

b) al à la facultât di sospindi la esecuzion di ats butâts fûr dai singui assessôrs par sotponiju al esam de zonte stesse.

6. Al soreintint al funzionament dai servizis e dai uficis e ae esecuzion dai ats, cul concors dai Assessôrs e cu la colaborazion prestade, seont lis sôs diretivis, dal Segretari comunâl.

7. Al stipule i contrats dal Ent tal câs che i stes a vignedin butâts jù dal Segretari comunâl e simpri che no sedin Dirigjents che int vedin facultât par leç.

8. Come Uficiâl dal Guvier al soreintint ai servizis di competence statâl assegnâts al

Comun, seont chel stabilît de leç de Republiche.

9. Il Sindic, dentri dai 45 dîs de prime sentade dal Consei, sintude la Zonte, al presente al Consei lis liniis programatichis relativis aes azions e ai progjets di realizâ dilunc il mandât. Dentri dai 45 dîs seguitîfs il Consei al esamine chest program cu lis eventuâls propuestis di integrazion, adeguaments e modificichis presentadis di ogni Conseîr Comunâl e su di lui si pronuncie cuntune votazion.

Cun scjadince anuâl, dentri dal 30 di Setembar, insieme cu la verifiche obleade dai ecuilibris di bilanç, il Consei al proviôt a verificâ la metude in vore des liniis programatichis di Bande dal Sindic e de Zonte. E je facultât dal consei proviodi a integrâ tal cors de durade dal mandât, cun adeguaments struturâi e/o modificichis, lis liniis programatichis su la fonde des esigjencis e des problematichis che a vessin di saltâ fûr tal contest locâl.

10. Il distintîf dal Sindic e je la fasse tricolôr cu la steme de Republiche e la steme dal Comun, di puartâsi a stracuel.

Art. 34

## PODÊS DAL SINDIC

1. Il Sindic al nomene e al revoche i assessôrs comunâi.

2. Il Sindic al proviôt a nomenâ, designâ e revocâ i rapresentants dal Comun cja dai ents, aziendis e istituzions, su la base dai indreçaments stabilîts dal Consei comunâl, fale la competence dal Consei comunâl ae nomine di propriis rapresentants li di ents, aziendis e istituzions riservadis de leç propri al Consei stes.

3. Il Sindic al nomene i responsabii dai uficis e dai servizis, al dâ e al definîs lis incarghis dirigenziâls e chês di colaborazion esterne seont lis modalitâts e i criteris stabilîts de leç, oltri che dal statût e dai regolaments comunâi.

4. Il Sindic al nomene il Segretari Comunâl sielzintlu inte liste a pueste e al dâ e al revoche al Segretari Comunâl, se lu riten oportun, lis funziions di Diretôr gjenerâl tal câs che no sedi stipulade une convenzion a pueste cun altris comuns pe nomine dal Diretôr stes.

5. Il Sindic al à la facultât di assegnâ a ogni assessôr funziions di aministrazion ordenadis par grups di materiis e cun deleghe di forme.

6. Des deleghis dadis dal Sindic ai efiets dal precedent come 5, e à di sei dade comunicazion al consei e ai orghins previodûts de leç, oltri che a une adeguade informazion ai citadîns.

7. Il Sindic al à la facultât di assegnâ a conseîrs comunâi la deleghe a rapresentâlu pe tratazion di determinâts afârs che a rientrin te sô competence, e a partecipâ tal so puest aes ativitâts di ents, istituzions, associazions, comissions, ecc.. . Lis deleghis, stant al precedent come, no puedin vê par contignût il compiment di ats cun relevance esterne al comun. Di cheste rapresentance il conseîr comunâl al rispuidarà diretementi al Sindic.

Art.35

## RAPRESENTANCE E COORDENAMENT

1. Il Sindic al rapresente il Comun tai orghins dai Consorzis dulà che al è presint il stes e al pues delegâ un Assessôr a esercitâ chestis funzions.
2. Il Sindic al rapresente il Comun te promoziun, conclusion e atuazion dai acuardis di program, seont lis modalitâts previodudis dal presint statût.
3. I spiete al Sindic, te suaze de discipline regjonâl e su la base dai indreçaments fats dal Consei comunâl, coordinâ i oraris dai servizis comerciâi, dai servizis publics e di viertidure al public dai uficis periferics des aministrazions publichis, disponint tes relativis ordenancis i proviodiments plui adats par armonizâ il davuelziment dai servizis aes esigjencis complessivis e gjenerâls dai utents.

Art. 36

## IL VICE SINDIC

1. Il Sindic al deleghe un assessôr, sielzût di lui, a sostituïlu in câs di assence o impediment, in dutis lis funzions dadis a lui de leç, dal statût e dal regolament.
2. Al assessôr soredit i ven dade la cualifiche di vicesindic
3. Il Vicesindic al esercite lis funzions di Sindic in câs di assence o di impediment temporani o di suspension dal Sindic dal exercizi de funzion cjapade ai sens de leç.
4. Il Vicesindic al esercite lis funzions di Sindic, fin aes eleziuns, in câs di dimissions, impediment permanent, rimozion, decjadence o muart dal Sindic.
5. In câs di assence o impediment dal Sindic e dal Vicesindic, lis funzions sostitutivis dal Sindic a son esercitadis dal assessôr plui vecjo di etât.

Art. 37

## PODÊS DI ORDENANCE

1. Il Sindic, come cjâf de Aministrazion comunâl, al à il podê di butâ fûr ordenancis par disponi la obediencia, di bande dai citadins, di normis di leç e di regolaments o par prescrivi adempiments o compartaments diventâts necessaris pal interès gjenerâl o dal verificâsi di particolârs condiziuns.
2. Il Sindic, come Uficiâl di Guvier, al cjape proviodiments contingjents e urgjents metint fûr ordenancis in materie di sanitât e igjen, edilizie e polizie locâl, par prevignî e eliminâ grâfs pericui che a menacin la sigurece dai citadins. Al cjape in chescj câs i podês e al met



in vore i proviodiments previodûts de leç.

3. I ats viodûts tai precedents comis a àn di jessi motivâts e a son adotâts tal rispjet dai principis gjenerâi dal ordenament juridic e cu la osservance des normis che a regolin i procediments aministratîfs.

4. In câs di assence o impediment dal sindic, chel che lu sostituîs al esercite ancje lis funziions come al presint articul.

## **TITUL III**

### **ISTITÛTS DI PARTECIPAZION POPOLÂR**

#### Cjâf I

#### LA PARTECIPAZION DAI CITADINS AE AMINISTRAZION COMUNÂL

#### Art. 38

#### PARTECIPAZION DAI CITADINS

Il Comun al garantîs la efetive partecipazion democratiche di ducj i citadins a la vite aministrative dal Ent. Par chest al considere cun favôr il formâsi di associazions cence fins di vuadagn cun finalitâts sientifichis, culturâls, religjosis, di promoziion sociâl e civîl, di protezion dal ambient e dal patrimoni artistic, sportîf, dal timp libar. Il Comun al promôf ancje altris formis di partecipazion democratiche dai citadins che no son residents, ma che a studiin o a lavorin tal comun.

#### Art. 39

#### PARTECIPAZION AL PROCEDIMENT AMINISTRATÎF

Il Comun tal procediment aministratîf relatîf ae adozion di ats che a rivuardin situaziions juridichis sogjetivis o interès pandûts di citadins, singui o associâts, al proviôt la partecipazion dai interès cu la vision dai ats dal procediment e la presentazion di memoriis scritis e documents che la aministrazion e à l'oblic di valutâ.

#### Art. 40

#### VALORIZAZION DES FORMIS ASSOCIATIVIS E ORGHINS DI PARTECIPAZION

1. L'aministrazion comunâl e favorîs la ativitât des associazions, dai Comitâts o di Ents presints tal propri teritori, magari dome in fraziions o in cuartîrs, par tutelâ i interès pandûts o che a àn alts valôrs culturâi, economics e sociâi.

2. Il Comun al incentive la partecipazion dai nomenâts organisims ae vite aministrative dal Ent cun contribûts consultîfs aes comissions conseârs, l'acès aes struturis e ai servizis comunâi, la pussibilitât di presentâ des memoriis, documentaziions, osservaziions utilis ae formazion di programs publics di intervent e ae soluzion dai problemis aministratîfs.

3. L'Aministrazion comunâl e podarà, ancje, intervignî cu la concession di sovenziions, contribûts, sussidis e aiûts finanziariis, e in plui cu la atribuzion di vantaçs economics di cualsisei gjenar, par sostignî lis iniziativis promovudis dai organisims, stant al prin come, predeterminant i mûts e lis formis intun regolament a pueste, seont ce che al prescrîf l'art. 12 Leç 241 / 90.

4. Il Comun al pues afidâ a lis Associazions e ai Comitâts, di pueste dâs dongje, la organizazion di manifestaziions, assegnant i fonts necessaris: il relatîf rindicont de spese al è fat bon de Zonte Comunâl.

Art. 41

#### VALORIZAZION DAL ASSOCIAZIONISIM ECONOMIC

1. Il comun al valorize lis formis di associazionisim economic e di cooperazion autonomis.  
2. Te sielte de forme di gestion dai servizis, il Comun al podarà acuardâ la proprie preference ae concession, li che al è pussibil, a Cooperativis, Associazions di volontariât, e a altri formis associativis cence fins di vuadagn.

Art. 42

#### CONSULTE COMUNÂL

1. Une Comission conseâr permanent e à il compit di organizâ i rapuarts tra i orghins dal Comun e lis associazions dai citadins. Cheste e proviôt a regjistrâ intune liste prontade di pueste lis associazions e organizaziions che int fasin domande, documentant il possès dai requisîts stabilîts dal respetîf statût. A puedin jessi separadis lis associazions indreçadis viers lis ativitâts economichis, sociâls e dal lavôr e lis associazions indreçadis ae culture, ae istruzion, al sport, ae tutele dal ambient, ae cualitât de vite e ae Pâs.

2. Il Consei Comunâl al istituîs des Consultis tal cercin de economie, dal lavôr e des ativitâts sociâl, de culture, de istruzion, dal sport, de tutele dal ambient e de cualitât de vite e de Pâs. Chescj organisims a davuelzin une ativitât propositive e di consultazion.

3. Lis modalitâts di composizion, nomine, funzionament e la durade des Consultis a son stabilidis di un Regolament di pueste.

4. La Aministrazion Comunâl tal moment di preparâ il bilanç preventîf, al sarà obleât a

sintî lis Consultis comunâls tes materiis di lôr competence.

## Cjâf II

### LA CONSULTAZION DAI CITADINS E I REFERENDUMS

#### Art. 43

##### CONSULTAZION DE POPOLAZION

1. Tes materiis di esclusive competence locâl di interès comun e cul fin di consintî la miôr impostazion e realizazion des iniziativis, a puedin jessi inviadis formis diversis di consultazion de popolazion.
2. In particulâr, lis consultazions, puartadis indenant dai orghins competents par materie, a podaran davuelzisi seont la forme dal confront diret intune assemblee, doprant dai cuestionaris, cul cjapâ dentri tai lavôrs des comissions e cun ogni altri mieç bon par rivâ al fin.
3. L'orghin competent al podarà avalêsi des structuris comunâls par realizâ lis iniziativis che a varan di sei precedudis de plui largje publicitât pussibil par podê rivâ ai interlocutôrs.
4. Lis osservazions, i sugjeriments, lis propuestis che a vessin di rivâ dai citadins, singui o associâts, a saran valutadis cun atenzion di bande dal orghin interessât, che al darà dut câs un cuintripont a chei che a àn fat i intervencions, indicant i uficis che a seguiran lis praticis.
5. Lis consultazions no puedin sei puartadis indenant in timp di operazions di vôt e tai mês di Lui e Avost.

#### Art. 44

##### ISTANCIS, PETIZIONS E PROPUESTIS

1. I citadins, singui o associâts, e chei no residents che a studiin o che a lavorin tal comun, a puedin presentâ in forme scrite aeministrazion des istancis, petizions e propuestis indreçadis a promovi dai intervencions par une miôr tutele di interès coletîfs e ae afermazion dai dirits individuâi.
2. Il Sindic al darà lis domandis, lis petizions e lis propuestis ai orghins competents par materie che, podint avalêsi dai uficis e di contribûts esternis, a esprimaran un parê su la cuistion dentri dai tiermins indicâts tal sucessîf art. 66.
3. Lis propuestis a puedin jessi presentadis dai sogjets indicâts dal art. 38 in forme articolade o di implant di delibare.

4. Il Sindic al informarà i interessâts sul esit o su la procedure de pratiche.

5. Dutis lis petizions che a àn passe 100 firmis a vignaran discutudis in Consei comunâl.

Art. 45

#### AZION POPOLÂR

Ogni eletôr dal Comun al pues fâ valê in judizi lis azions e i ricors che i spietin al Comun.

Art. 46

#### REFERENDUM

1. Il referendum al è un istitût previodût de leç e indicât dal presint Statût, che, cun chest, ducj i eletôrs dal Comun a son clamâts a pronunciâsi in merit ai programs, plans, progjets, intervents e ogni altri argoment – fale chei che a son indicâts tal sucessîf come – relatîfs ae Aministrazion e al funzionament dal Comun, esprimint sul teme o sui temis proponûts il propri assintiment o dissension par che i orghins che i spiete di decidi, a cjapin lis propriis determinazions, consapevui dal orientament prevalent de comunitât.

2. I referendums a son stabilîts cun delibare dal Consei comunâl cun vôt favorevul de maiorance dai conseîrs assegnâts. La iniziative dal referendum i spiete al stes Consei comunâl o pûr al 15 % dai eletôrs iscritti tes listis elettorâls. Il Sindic, diventade esecutive la deliberazion, al da cors aes proceduris.

3. Tal câs che la propueste di referendum e sedi presentade dal 15 % dai eletôrs, lis firmis di chescj ultins a àn di jessi autenticadis tes formis di leç e ancje di funzionaris comunâi incjariâts dal Sindic. La propueste e à di vê il test di someti ai eletôrs e di jessi presentade al Sindic dentri des oris 12.00 dai 31 di Dicembar di ogni an. Il referendum si davuelzarà tal an seguitîf a chel che e je stade presentade la propueste.

4. La propueste e à di contignê indicazions precisis dal ogjet e e à di jessi butade jù in maniere clare par permeti des rispuestis precisis de bande dai letôrs. La domande di referendum, sotscrie di almancul cinc citadins eletôrs che a declarin di volê racuei lis firmis e che a saran i referents pe Aministrazion comunâl, e à di jessi depositade li de segretarie comunâl. Il Consei comunâl al nomene al inizi de legislature une Comission Conseâr di pueste che dentri 30 dîs dal riceviment, e esaminerà la formulazion dal cuesît referendari di someti a delibare dal Consei comunâl. Se a saltin fûr des contestazions, i referents a varan di jessi sintûts de Comission che eventualmentri e colaborarà cui presentadôrs par tornâ a presentâ il cuesît.

5. La racuelte des firmis e va completade dentri dai 90 dîs de date di publicazion de deliberazion conseâr. Lis firmis a saran cjapadis sù sui modui di pueste preparâts dai promotôrs e vistâts par cure dal Segretari comunâl.

6. I modui che a contegnin lis firmis e il cuesît referendari a saran depositâts li de segretarie dal Comun che int lassarà la ricevude. Il Sindic ju trasmet ae comission specifiche come

indicât dal precedent cuart come. La Comission e verifiche prime la regolaritât de presentazion e la validitât des firmis. Dopo de verifiche de Comission, di fâsi dentri dai trente dîs de date di riceviment, il Sindic al propon al Consei il proviodiment che al dispon il referendum. I referendums a son fissâts dal Sindic e si tegnin te date stabilide te deliberazion conseâr.

7. No puedin jessi ogjet di referendum lis seguitivis materiis:

- a) revision dal Statût dal Comun e des aziendis speciâls;
- b) disipline dal stât juridic e des assunziions di personâl; plantis organichis dal personâl e relativis variaziions;
- c) plans urbanistics gjenerâi;
- d) tribûts locâi, tarifis dai servizis e di altris imposiziions;
- e) designazion e nominis dai rapresentants.

8. La publicazion adeguade de consultazion e sostituîs la stampe e la consegne dai certificâts eletorâi. La partecipazion ae votazion e je atestade cul poiâ la firme dal eletôr su la liste di sezion.

9. La consultazion si davuelç intune sole zornade festive. La viertidure dai seçs pe votazion e à une durade di dodis oris cence mai fermâ, des 8 di matine aes 8 di sore sere. Il spoi des schedis al scomençarà subit dopo de sierade des votaziions e al continuerà fin ae ultimazion des operaziions. A puedin davuelzisi tal stes timp plui consultaziions referendariis.

10. Il referendum al sarà valit se al varà partecipât al vôt almancul il 50 plui un dai eletôrs iscritti.

11. Il risultât dal referendum al è proclamât e rindût public dal sindic cui mieçs di comunicazion plui adats par che dute la citadinance int vegni a cognossince.

12. Lis propuestis di referendum che no son stadis fatis buinis, a domande dai presentadôrs, a àn di jessi discutudis in Consei come des petiziions.

### Cjâf III

## IL DIRIT DI ACÈS E DI INFORMAZION DAL CITADIN

Art. 47

### DIRIT DI ACÈS E DI INFORMAZION

Par sigurâ la transparence e la imparzialitât de ativitât aministrative al è garantît ai citadins, singui o associâts, pe tutele di situaziions juridichis sogjetivis o di interès pandûts, il dirit di acès ai documents aministratîfs dal Comun e dai Ents e aziendis dipendentis seont di ce che al previôt lis normis legjislativis dal ordenament statâl e dal specific regolament comunâl. Il regolament, di adotâ tai tiermins e cu lis modalitâts de Leç 7 . 8 . 90 n. 241:

- a) al individue, cun normis di organizazion dai uficis e dai servizis, i responsabii dai

procediments;

b) al dete lis normis necessariis par sigurâ ai citadins la informazion sul statût dai ats e des proceduris e sul ordin di esam di domandis, progjets e proviodiments che dut câs ju rivuardin;

c) al sigure il dirit dai citadins di acedi, in gjenerâl , aes informazions in possès de aministrazion.

Cjâf IV

## IL DIFENSÔR CIVIC

Art.48

### ISTITUZION

A garanzie de imparzialitât e dal bon andament de Aministrazion comunâl al è istituît l'Ufici dal Difensôr Civic.

Art. 49

### NOMINE

Il Difensôr Civic al ven nomenât dal Consei Comunâl, a scrutini segret e a maiorange di doi tierç dai Conseîrs assegnâts; daspò la prime votazion cu la maiorange assolude dai Conseîrs assegnâts e dopo la seconde votazion e baste la maiorange relative dai vòts valits esprimûts.

Art. 50

### RECUISÎTS E INCOMPATIBILITÂT

Il Difensôr Civic al è sielt tra lis personis che a àn documentade esperience e competence in materie juridiche amministrative e su la fonde di criteris di indipendence, obietivitât e serietât di judizi. L'Ufici dal Difensôr Civic nol pues jessi esercitât di chei che a davuelzin une funzion politiche o di istitût al interni dai Ents Statâi, Regjonâi, Provinciâi e Comunâi o che dut câs a davuelzin une ativitât in cualchi maniere vincolade e colegade ai Ents sore nomenâts. Nol pues jessi nomenât Difensôr Civic chel che si cjate tes condizions di no eleibilitât o incompatibilitât ae cjarie di Conseîr comunâl.

Art. 51

## DURADE DE INCARGHE – DECJADENCE - REVOCHE

1. La durade in cjarie dal Difensôr Civic e je di trê agns. (\*) Lui al esercite lis sôs funzions fin al insediament dal sucessôr e al pues tornâ a sei elet dome une volte.
2. Il Difensôr Civic al cole de incjarie pes stessis causis che par chestis si piert la qualifiche di conseîrs o pe vignude de condizion di no eleibilitât e incompatibilitât indicade tal articul precedent. La decjadence e je pronunciade dal Consei comunâl.
3. Il Difensôr Civic al pues jessi revocât de incjarie par grave mancjance ai dovês di ufici, cun deliberazion motivade dal Consei comunâl, adotade cun doi tierçs dai Conseîrs assegnâts.

(\*) prin come, prin cjâf di rie modificât cun deliberazion di C.C. n° 3 dal 6/2/2006

## Art. 52

### SEDE – INDENITÂT

1. Il Difensôr Civic al à la sede te Cjase Comunâl.
2. Al Difensôr Civic i spietin la indenitât di funzion, la indenitât di mission e la rimbors des spesis di trasport te misure previodude de leç pai assessôrs Comunâi

## Art. 53

### FUNZIONI

1. Il Difensôr Civic al esercite lis sôs funzions cun plene autoritât e independence e cun duçj i podês che lis stessis a domandin par garantî e tutelâ i interès dai citadins, ancje cul fin di prevignî potenziâls contrarietâts tra la publiche aministrazion e i citadins. (\*)
2. Metintsi dacuardi cun altris comuns, al pues davuelzi lis funzions ancje a favôr dai comuns midiesims. Il Difensôr Civic al pues intervignî, a seont di ce che al recite l'art. 38, su domande dai citadins associâts o di proprie iniziative, cja de Aministrazion comunâl, e ancje tai confronts di altris publichis aministrazions, lis societâts o associazions publichis o privadis che a gjestissin i servizis publics comunâi tal cercin dal teritori comunâl, par aciertâ che i proviodiments aministratîfs a vebin regolâr cors e che i proviodiments a sedin in maniere corete e daurman butâts fûr.
3. Par chest al pues convocâ, tal cercin de aministrazion comunâl, il responsabil dal servizi interessât dentri dal tiermin che lui al fisse e domandâ i documents, informazions, scleariments, cence che a puedin dineâi o metii il segret di ufici.
4. Acuisidis lis documentazions e informazions necessariis, al comuniche al citadin, o ae associazion che e à domandât l'intervent, lis sôs valutazions e l'eventuâl azion promovude. Al segnale al responsabil dal procediment lis iregolaritâts e i vizis di procedure rilevâts,

invidantlu a proviodi ai necessaris adeguaments. Al comuniche ai orghins sore nomenâts lis disfunzions, i abûs, lis carencis e i ritarts riscontrâts. Al è, in plui, tignût a informâ la autoritât judiziaria di eventuâi reâts vignût a cognossince.

5. Se il procediment amministratîf li che al è intervignût il Difensôr Civic si conclût cuntun provediment che nol rispjeti lis sôs considerazions, tocje dâ une juste motivazion. Il Difensôr Civic al pues domandâ di riesaminâ il provediment cuant che al cjati des iregolaritâts o vizis procedurâi.

(\* ) come modificât cun delibare C.C. n° 3 dal 6/2/2006)

Art. 54

## **RAPUARTS CUL CONSEI COMUNÂL**

Il Difensôr Civic al presente al Consei Comunâl, dentri il mêsi di Març, la relazion su la ativitât davuelte tal an precedent, segnalant lis disfunzions cjatadis e formulant propuestis indreçadis a miorâ il bon andament e la imparzialitât de azion amministrative pe affermazion dai dirits dai citadins.

## **TITUL IV**

### **ORGANIZAZION DAI UFICIS DAL PERSONÂL**

Art. 54 (bis)

#### **INDIVIDUAZION POLITICHE - AMINISTRATIVE: FUNZIONIS E RESPONSABILITÂTS**

Tal contest dal principi di separazion nete tra i compits di indreçament / control e chei di gjestion amministrative al è atribuît in linie gjenerâl:

- a) ai orghins di guvier la definizion dai obietîfs e dai programs di atuâ e la verifiche che i risultâts de gjestion amministrative a corispuindedin aes diretivis gjenerâls dadis.
- b) al Segretari Comunâl, al Diretôr Gjenerâl e ai responsabii di Servizi, come indicât tal seguitîf come 3, l'esercizi de gjestion finanziarie, tecniche e amministrative, comprendude la adozion di ats che a impegnin l'ent viers l'esterni, cun podês di spese autonomis tal cercin di obietîfs e di disponibilitâts finanziariis assegnâts; di organizazion des risorsis umanis e strumentâls e di control. Lôr a son responsabii de Gjestion e dai risultâts relatîfs.
- c) In atuazion di ce che al è stât indicât tal come precedent a saran definidis midiant il regolament de organizazion e chei altris regolaments previodûts de leç, lis singulis e specifichis atribuzions e competencis.
- d) Al è definît "responsabil dal servizi", il dipendent metût a cjâf di une unitât operative autonome sei semplice che complesse.



Art. 55

## L'ORGANIZAZION GJENERÂL

L'organizazion gjenerâl dai uficis e dai servizis comunâi e je stabilide cuntun regolament a pueste cjapât sù dopo une contratazion cu lis OO.SS. di categorie.

Cheste e à di jessi impostade cun criteris di autonomie operative, funzionalità e economicità di gjestion e seont i principis di professionalità e responsabilità.

Art. 56

## SEGRETARI COMUNÂL

1. Il Segretari comunâl al è nomenât dal Sindic, che i stabilis lis funzions, al è sielt tra i iscrits te liste di pueste.
2. Lis funzions, il stât juridic e il tratament economic dal Segretari Comunâl a son stabilîts de leç e de contratazion coletive.
3. Al ricêf lis dimissions dal Sindic, dai Assessôrs e dai Conseîrs, e ancje lis propuestis di revoche e lis mozions di sfiducie.
4. Al è a cjâf dal Ufici comunâl pes elezions in ocasion des consultazions elettorâls.
5. Al Segretari Comunâl a puedin jessi atribuidis dal Sindic lis funzions di Diretôr Gjenerâl previodudis de leç.

Art. 57

## IL VICE SEGRETARI COMUNÂL

1. Il Vice Segretari comunâl al esercite lis funzions vicjaris dal Segretari comunâl, judantlu e sostituintlu in ducj i câs di vacanze, assence e ogni impediment tai mûts previodûts de leç e dal regolament.
2. Il Sindic, ai sens dal art. 13 de Leç 89/93 al previôt aes atribuzions dal incaric di Vice Segretari a un funzionari di nivel plui alt dal Ent.

Art. 58

## IL PERSONÂL

1. Il Regolament di organizazion dai uficis e servizis al definìs la dotazion organiche, lis cualifichis, lis funzions, i livei professionâi e la responsabilità organizative dal personâl dal Ent in conformitât ai principis fissâts de leç e dal statût e cu la contratazion des organizacions sindacâls.  
I spietin ai dirigjents / funzionaris nomenâts dal Sindic Responsabii dai servizis ducj i compits previodûts di pueste de leç.
2. L'Ent si cjape la cjame pal inzornament professionâl e la ricualificazion dal personâl

dipendent.

3. Il personâl a timp determinât o cun rapuart di colaborazion professionâl a tiermin al ven assunt de Zonte cu lis modalitâts e tai câs previodûts de leç e dal regolament.

4. Il regolament come al come 1 al discipline, tal rispjet des normis in vore in materie, la responsabilitât, lis sanzions disciplinârs, il relatîf procediment e il tornâ a acetâ in servizi.

Art. 59

## PERSONÂL ESTERNI

La cuviertidure dai puescj di responsabil des unitâts organizativis e, in gjenar, dai puescj che a compuartin cualifichis di dirigent, e pues vignî ancje a mieç di personâl esterni assunt cun contrat a timp determinât, di dirit public o, in vie ecezionâl, di dirit privât, cun delibare motivade, cuant che a sedin domandâts dai requisîts di alte specializazion e professionalitât restants fers i requisîts previodûts pal puest di cuvierzi.

Il contrat a timp determinât nol pues jessi stipulâts par un periodi superiôr ai cinc agns.

Art. 60

## COLABORAZIONS ESTERNIS

Pai obietîfs determinâts e cun convenzions a tiermin il Regolament al pues previodi colaborazions esternis di alt nivel di professionalitât.

Art. 61

## INCARICS TEMPORANIS

La direzion di areis funzionâls che a comprendin plui unitâts organizativis e pues jessi conferide sei al personâl dipendent sei al personâl come indicât tai articui precedents par no plui di cinc agns, fat salff il rinovâ seont lis modalitâts previodudis de leç e dal regolament dal personâl.

Art. 62

## INCOMPATIBILITÂT

L'Ufici di dipendent comunâl nol è compatibil cun ogni altri uffici o prestazion di opare paiade salff la autorizazion seont la Leç o dal Regolament Organic.

Art. 63

## DE RESPONSABILITÂT AMINISTRATIVE E CONTABIL

1. Pai aministradôrs e i dipendents comunâi si osservin lis disposizion in vore in materie di responsabilitât dai impleâts civîi dal Stât.
2. Il tesoriêr e ogni altri contabil che al vedi maneç di bêçs dal Comun o che al sedi incaricât de gjestion dai bens comunâi, oltri chei che a jentrin dentri, cence une legâl autorizazion, tal maneç di bêçs dal Comun al à di rindi cont de gjestion e al è sogjet ae jurisdizion de Cort dai Conts seont lis normis e lis proceduris previodudis des leçs in vore.
3. La azion di responsabilitât si prescîf in cinc agns dal moment dal fat. La responsabilitât tai confronts dai aministradôrs e dai dipendents dal Comun e je personâl e no si trasmet ai erêts.
4. Il responsabil dal servizi interessât e il responsabil di resonarie a rispuindin in vie amministrative e contabil dai parêts su lis propuestis di deliberazion.

Art. 64

## FORMIS E TIERMINS PE ESPRESSION DI PARÊS

1. I parêts dai Responsabii, a varan di jessi demandât di norme almancul cinc o dodis dîs prime de sedude dal Orghin deliberant a seont che si trati de Zonte o dal Consei comunâl, lôr a varan di jessi esprimûts par scrit e cjapât sù dal Segretari comunâl che al cure la istrutorie des deliberazions.
2. Pes deliberazions urgjentis ( di declarâ subit esecutivis) il parê al varà di jessi dât dentri lis vincjecuatri oris de domande.
3. I parêts esprimûts a varan di jessi inserîts cuntune citazion a pueste tra lis jentradis di ogni at di delibare.
4. Il parê tecnic su lis propuestis di deliberazion che a rivuardin struments urbanistics e la aprovazion di projets di oparis publichis e lôr variantis al è dât dal tecnic incaricât.

## TITUL V

### ATIVITÂT AMINISTRATIVE

Cjâf I

### ATIVITÂT REGOLAMENTÂR E DELIBERATIVE

Art. 65

#### PODÊ DI INIZIATIVE

1. Il podê di iniziative, in ogni cuistion di competence dal Consei comunâl al parten ai Conseîrs, ae Zonte e al Sindic.
2. Il regolament di organizazion e di funzionament dal Consei comunâl, al dissipline lis modalitâts di esercizi dal podê di iniziative e l'ordin des prioritâts.
3. Il Regolament stes al sigure in ogni câs ai Conseîrs la cognossince dai ats necessaris pal davuelziment dal lôr mandât e al tutele la corete manifestazion des opinions e la libare espression dal vôt.

Art. 66

#### PROCEDIMENT AMINISTRATÎF

1. Il Comun al met in vore i propriis provvedimenti uniformantsi ai criteris di trasparenza, semplicitât e velocitât des proceduris.
2. I provvedimenti a àn di jessi motivâts e i regolaments compagnâts di une relazion, che int costituîs part integrant, e int indiche lis resons de lôr adozion e lis sieltis operadis.
3. Il regolament al dissipline il procediment aministratîf, la publicitât e l'acès ai ats e a lis informazions seont i principis de leç 7 di Avost 1990, n. 241.
4. Il Comun, pal davuelziment des funziions propriis o delegadis e dai servizis al pues atuâ formis di cooperazion cun altris Comuns e cu la Provincie.

Cjâf II

#### SERVIZIS

Art. 67

#### SERVIZIS PUBLICS COMUNÂI

1. Il Comun al pues assumi l'implant e la gjestion dai servizis publics che a vebin par ogjet la produzion di bens e ativitâts indreçadis a realizâ fins sociâi e a promovi il disvilup economic e civîl de comunitât locâl.

2. I servizis di gjestî cun dirit di private a son stabilîts de leç.

Art. 68

## GJESTION SERVIZIS PUBLICS

1. Il Consei comunâl al delibare la assunzion dal implant e de gjestion dai publics servizis tes seguitivis formis:

- a) in economie, cuant che pes modestis dimensions o pes carateristicis dal servizis, nol sedi miôr costituî une istituzion o une aziende speciâl;
- b) in concession a tierçs cuant che a esistin resons technichis, economicis e di oportunitât sociâl;
- c) a mieç istituzion, pal esercizi di servizis sociâi cence impuartance imprenditoriâl;
- d) a mieç di aziende speciâl, ancje pe gjestion di plui servizis di impuartance economiche e imprenditoriâl;
- e) a mieç di societâts par azions, cu la partecipazion di altris sogjets e o privâts pe gjestion.

2. Cualsisei forme di gjestion sielzude pe organizazion dal servizis a varan di jessi previodûts dai criteris e formis di racuardi tra il sogjet gjestôr e il Comun, adatis a sigurâ di perseguî il public interès.

Art. 69

## AZIENDIS SPECIÂLS E ISTITUZIONI

1. Il Consei comunâl al pues deliberâ la costituzion di aziendis speciâls, indotadis di personalitâts juridiche e autonomie gjestionâl e imprenditoriâl e int fâs bon il statût.

2. Il Consei comunâl al pues deliberâ la formazion di “istituzioni”, organisims indotâts di sole autonomie gjestionâl.

3. Lis aziendis speciâls e lis istituzioni a operin cirint il rispjet dal ambient, indotant come criteri de lôr ativitât il principi dal sparagn des risorsis e evitant di strassâ energjie.

4. Orghins de aziende e de istituzion a son:

a) il Consei di amministrazion, cun sîs membrs, doi di chescj di minorance, nomenâts dal Consei comunâl fûr dal propri sen, sielzûts tra chei che a àn i requisîts pe elezion a conseîr comunâl e une speciâl competence tecniche o amministrative pai studis davuelts, pes funzions disvilupadis cja des aziendis publichis o privadis, par uficis publics davuelts. Si aplichin pe revoche dai competents dal Consei di Amministrazion lis normis previodudis dal ordenament in vore pe revoche dai assessôrs;

b) il President, che al è nomenât dal Consei comunâl cun votazion separate, prime di chê dai altris components dal Consei di amministrazion;

c) il Diretôr che i compet la responsabilitât de gjestion. Lui al è nomenât cu lis modalitâts previodudis dal regolament. Il Diretôr al è nomenât dal Consei Comunâl cu lis modalitâts indicadis dal art. 59 cun contrat di cinc agns, di podê rinovâ, di dirit public o di dirit privât.

5. L'ordenament e il funzionament des aziendis speciâls a son disciplinâts dal propri statût e dai regolaments; chês des istituzions a son disciplinâts dal presint statût e dai regolaments comunâi.

6. I spiete al Comun conferî il capitâl che al covente, determinâ lis finalitâts e i indreçaments, fâ bogns i at fundamentâi, verificâ i risultâts di gjestion, proviodi ae cuvierture dai eventuâi coscj sociâi.

### Cjâf III

#### FORMIS ASSOCIATIVIS E DI COOPERAZION – ACUARDIS DI PROGRAM

##### Art.70

#### CONVENZION

1. Il Consei comunâl, su propueste de Zonte, al delibare des convenzions a pueste par stipulâ cun altris Comuns e / o Provincie, al fin di davuelzi in maniere coordinade funzions e servizis determinâts.

2. Lis convenzions a àn di stabilî i fins, la durade, lis formis di consultazion dai Ents contraents, i lôr rapuart finanziariis e i vicendevui oblics e garanziis.

##### Art. 71

#### CONSORZI

1. Il Comun al pues partecipâ ae costituzion di consorzis cun altris Comuns e / o Provincie pe gjestion associate di un o plui servizis.

2. A chest fin il Consei comunâl al approve, a maiorance assolude dai components une convenzion ai sens dal precedent articul, insieme al statût dal Consorzi.

3. La convenzion e à di previodi l'oblic, a caric dal Consorzi, de trasmission al Comun dai ats fundamentâi dal Consorzi stes.

4. L'Aministrazion Comunâl e partecipe al consorzi cun propri rapresentant e cun responsabilitât pareli ae cuote di partecipazion fissade de convenzion e dal statût dal consorzi stes. (\*)

5. Tai confronts dal Sindic, dai components de Zonte comunâl e dal Consei comunâl no

cjatin aplicazion lis normis su la incompatibilitât par chel che al rivuarde lis eventuâls designazions a partecipâ ai Conseis di Aministrazion di consorzis e di societâts partecipadis e controladis, se la partecipazion dal Comun in chescj Ents e Societâts nol sedi superiôr al 10 % come che al è previodût dal art. 1, come 41 de Leç Regjonâl 11. 12. 2003, 21. (\*\*)

(\*) come modificât cun deliberazion di C.C. n° 3 dal 6/2/2006

(\*\*) come zontât cun deliberazion di C.C. n° 3 dal 6/2/2006

Art. 72

## ACUARDIS DI PROGRAM

Tai acuardis di program, il consens de Aministrazion Comunâl al ven esprimût dal Sindic sintût il Consei comunâl.

## TITUL VI

### FINANCE E CONTABILITÂT

Art. 73

#### ORDENAMENT

1. L'ordenament des financis dal Comun al è riservât ae leç.
2. Tal cercin de finance publiche il Comun al è titolâr di autonomie finanziarie.
3. Il Comun al è in plui titolâr di potestât impositive autonome tal cjamp des impuestis, des tassis e des tarifis, e al à un propri demani e patrimoni.

Art. 74

#### ATIVITÂT FINANZIARIE DAL COMUN

1. La finance dal Comun e je costituide di:
  - a) impuestis propriis;
  - b) adizionâl e compartecipazions a impuestis erariâls e regjonâls;
  - c) tassis e dirits pai servizis publics;
  - d) trasferiments erariâls;

- e) trasferiments regionâi;
- f) altris propriis jentradis ancje di nature patrimoniâl;
- g) risorsis pai investimenti;
- h) altris jentradis.

2. I trasferiments erariâls a àn di garantî i servizis publics indispensabii; lis jentradis fiscâls a mantegnin i servizis publics ritignûts necessaris pal disvilup de comunitât e a integrin la contribuzion erariâl pe erogazion dai servizis publics indispensabii.

3. Tal cercin des facultâts concedudis de leç il Comun al istituìs, cun deliberazion dal Consei comunâl, impuestis, tassìs e tarifis, distribuint il caric tributari in maniere di sigurâ la partecipazion di ogni citadin in proporzion aes sôs efetivis capacitâts contributivis, adeguant chestis ultimis cun oportunis diferenziacions, par chel che al è pussibil, al cost dai relatîfs servizis e tindint a un simpri plui grant coinvolziment dai citadins te spese di sostignê par lôr.

4. Il Stât e la Region, se a previodin par leç câs di erogazion gratuite o agevolazions tai servizis di competence dal Comun, a àn di garantî lis risorsis finanziariis compensativis.

Art. 75

#### AMINISTRAZION DAI BENS COMUNÂI

1. Il Responsabil dai servizi al proviôt a tignê un inventari dai bens demaniâi e patrimoniâi dal Comun; chest al ven controlât, di regule, ogni cinc agns.

2. Tal regolament di contabilitât e vignaran previodudis lis normis relativis ae gjestion dai bens demaniâi e patrimoniâi.

Art. 76

#### CONTABILITÂT COMUNÂL: IL BELANÇ

1. L'ordenament finanziari e contabil dal Comun al è riservât ae leç dal Stât.

2. La gjestion finanziarie dal Comun si davuelç su la fonde dal belanç anuâl di prevision deliberât dal Consei comunâl osservant i principis de universalitât, de integritât e dal pâr economic e finanziari.

3. Il belanç e i prescrits alegâts par leç a àn di jessi metûts jù in maniere di consintî la leture pai programs, servizis e interventi.

4. I impegnis di spese a diventin esecutîfs cul vistât che al ateste la cuvierture finanziarie di bande dal Responsabil dai servizi finanziari.



Art. 77

## CONTABILITÂT COMUNÂL: IL CONSUNTÎF

1. I fats gjectionâi a son rilevâts par mieç de contabilitât economiche e dimostrâts tal rindicont che al comprend il cont dal belanç e il cont dal patrimoni.
2. La Zonte comunâl e aleghe al cont consuntîf une relazion illustrative dulà che e esprim lis valutazions di eficacie de azion condusude su la fonde dai risultâts otignûts in rapuart ai programs e ai coscj sostignûts, oltri ae relazion dal coleç dai revisôrs come che al recite l'art. 79 dal presint statût.

Art. 78

## ATIVITÂT CONTRATUÂL

1. Ai apalts di lavôrs, aes furniduris di bens e servizis, aes venditis, ai acuisçj a titul onerôs, aes permutis, aes locazions, pal perseguî i siei fins istituzionâi, il Comun al proviôt par mieç di contrats.
2. La stipulazion dai contrats e à di jessi precedude de determinazion dal Responsabil dal Servizi.
3. La determinazion e à di indicâ:
  - a) ce che cul contrat si intint otignî;
  - b) l'ogjet dal contrat, la sô forme e lis clausulis ritignudis essenziâls;
  - c) lis resons che a son ae base e lis modalitâts di siele dal contraent ametudis des disposizions in vore in materie di contrats dal Stât e de Regjon F.V.J.
4. In rapresentance dal Comun te stipulazion dai contrats al interven il Responsabil dal Servizi.

Art. 79

## REVISION ECONOMICHE E FINANZIARIE

1. Il Consei comunâl al elei, cun vôt limitât a doi components, il coleç dai revisôrs componût di trê membris, siefts in conformitât aes normis di leç.
2. I Revisôrs no àn di cjatâsi tes condizions di no eleibilitât e incompatibilitât previodudis dal art 236 dal T.U.D. Lgs 26/00;
3. No puedin jessi elets revisôrs dai conts i parincj o i parincj par leç jenfri il quart grât dai components de Zonte e dal Segretari comunâl, e ancje i legâi rapresentants di Ents o

associazions che a vebin rapuart economics di cualsei nature cul Comun.

4. I revisôrs a stan in cjarie trê agns e a puedin tornâ a jessi elets dome une volte; si puedin revocâ par inadempiment e cuant che a ricorin grâfs motifs che a influissin in maniere negative sul davuelziment dal lôr mandât e sul regolâr funzionament dal coleç oltri che pe pierdite dai requisîts che a àn dât lûc ae lôr elezion.

5. In câs di revoche, di dimissions o di decès di un revisôr, il gnûf revisôr al reste in cjarie fintremai che al dure il coleç dai revisôrs elets dal principi.

6. Il coleç dai revisôrs al colabore cul Consei comunâl te sô funzion di control e di indreçament, al esercite la vigilance su la responsabilitât contabil e finanziarie de gjestion dal Ent e al ateste la corispondence dal rindicont aes risultancis di gjestion, butant jù une relazion di pueste, che e acompagne la propueste di deliberazion conseâr dal cont consuntîf.

7. A chest fin i revisôrs a àn il dirit di acès ai ats e documents dal Ent.

8. Te relazion, stant al come 6, il coleç dai revisôrs al esprim i rilêfs e lis propuestis tindint a otignî une miôr eficienze, produtivitât e economicitât di gjestion.

9. Al Coleç dai revisôrs dai Conts al pues jessi afidât ancje il compit di eseguî des verifichis su questions relativis ai singui servizis comunâi.

10. I revisôrs, li che a riscontrin seriis iregolaritâts te gjestion dal Ent, int riferissin subit al Consei, par mieç di une comunicazion di pueste, insiemit ae denuncie ai competents orghins jurisdictionâi se si presentin ipotesis di responsabilitâts.

Art. 80

## TESORARIE

1. Il Comun al à un servizis di tesorarie.

2. I rapuarts dal Comun cul Tesorâr a son regolâts de leç e dal regolament di contabilitât, oltri che di une convenzion di pueste.

Art. 81

## CONTROL ECONOMIC DE GJESTION

1. Pal proseguiment des finalitâts implicitis tes proceduris dal control di gjestion i responsabii dai uficis e dai servizis, a eseguisin di tant in tant e, dut câs, ogni cuatri mê, operations di control e di verifiche economiche finanziarie su ogni ativitât al fin di orientâ lis decisions a criteris di convenienze economiche ven a stâi a criteris indreçâts a minimizâ i coscj a paritât di risultâts, riferintint ae Zonte.

Art. 82

#### PARTECIPAZION AE PROGRAMAZION

1. Il Comun al partecipe, formulant propuestis, ae programazion economiche, teritoriâl e ambientâl de Regjon.
2. Il Comun tal davuelziment de ativitât programatorie di sô competence si aten ai indreçaments gjenerâi di asset dal teritori e aes proceduris previodudis de leç.

### TITUL VII

#### DISPOSIZIONS FINÂLS E TRANSITORIIS

Art. 83

#### MODIFICAZIONS E ABROGAZION DAL STATÛT

1. Lis modificazions che a gjavin, a zontin, a sostituissin e la abrogazion totâl o parziâl dal Statût, a son deliberadis dal Consei comunâl cu la procedure previodude de leç.
2. La propueste di deliberazion di abrogazion totâl dal Statût e à di jessi compagne de propueste di deliberazion di un gnûf Statût in sostituzion dal precedent.

Art. 84

#### JENTRADE IN VORE

1. Il presint Statût, dopo il control dal competent orghin regjonâl, al è publicât sul Boletin Uficiâl de Regjon e metût tal quadri pretori comunâl par trente dîs seguitîfs.
2. Il Presint Statût al jentre in vore la trentesime zornade dopo sei stât metût fûr tal quadri pretori comunâl.
3. Il Segretari Comunâl al met ae fin dal Statût originâl la certificazion de date di jentrade in vore e de vignude esecuzion des formis di publicitât stant al prin come.
4. Il Sindic al invie il Statût, furnît di certificazion des vignudis publicazions come indicât tal precedent come, al Ministeri dal Interni par jessi metût te racuelte uficiâl dai statûts.

---

IL PRESINT STATÛT DAL COMUN DI SAN VÎT DAL TILIMENT AL À N. 57  
PAGJINIS E N. 84 ARTICUI

AL È STÂT ADOTÂT CUN DELIBERAZION DAL CONSEI COMUNÂL N. 385 IN  
DATE 15.10.1991 -INTEGRADE CUN DELIBERAZION DAL CONSEI COMUNÂL N.  
414 DAI 20.1.1992

RICOGNOSSUDE LEGJITIME DAL C.C.C. TE SEDUDE DAL 30.1.1992

PUBLICADE TAL CUADRI PRETORI PAR 30 DÎS SEGUITÎFS DAI 10.2.1992  
PUBLICÂT TAL B.U.R. DE REGJON FRIÛL VIGNESIE JULIE N. 6 IN DATE 5.8.1992  
MODIFICÂT CUN DELIBERAZION DAL CONSEI COMUNÂL N. 21 IN DATE  
26.7.1993

RICOGNOSSUDE LEGJITIME DAL CO.RE.CE.CO DI UDIN IN DATE 28.9.1993  
PUBLICADE TAL CUADRI PRETORI PAR 30 DÎS SEGUITÎFS DAI 5.11.1993  
PUBLICADE TAL B.U.R. DAL FRIÛL VIGNESIE JULIE N. 48 DAL 1. 12. 1993

MODIFICÂT CUN DELIBERAZION DAL CONSEI COMUNÂL N. 204 IN DATE  
30.6.94

RICOGNOSSUDE LEGJITIME DAL CO.RE.CE.CO DI UDIN IN DATE 27.9.1994  
PUBLICÂT TAL CUADRI PRETORI PAR 30 DÎS SEGUITÎFS DAI 13.10.1994  
PUBLICADE TAL B.U.R. DAL FRIÛL VIGNESIE JULIE N. 44 AI 2.11.1994

MODIFICÂT CUN DELIBERAZION DAL CONSEI COMUNÂL:  
N. 19 IN DATE 1.3.2001 RICOGNOSSUDE CENCE VIZIS DI LEGJITIMITÂT DAL  
CO.RE.CO DI UDIN IN DATE 4.6.2001  
N. 40 IN DATE 28.5.2001, RICOGNOSSUDE CENCE VIZIS DI LEGJITIMITÂT DAL  
CO.RE.CO DI UDIN IN DATE 27.6.2001  
PUBLICADE TAL CUADRI PRETORI PAR 30 DÎS SEGUITÎFS DAI 29.6.2001  
PUBLICÂT TAL B.U.R. DAL FRIÛL VIGNESIE JULIE DAI 10.8.2001  
SUPPLEMENT STRAORDENARI N. 14

MODIFICÂT CUN DELIBERAZION DAL CONSEI COMUNÂL N. 3 DAL 6 DI  
FEVRÂR 2006, ESECUTIVE AI SENS DE LEÇ.  
ADEMPIMENTS PREVIODÛT DE LEÇ REGJONÂL N° 1/2006 ART. 12  
PUBLICÂT TAL CUADRI PRETORI PAR 15 DÎS SEGUITÎFS DAI 10 DI FEVRÂR  
2006  
PUBLICÂT L'ESTRAT CHE AL RIPUARTE LIS SOLIS MODIFICHIS SUL B.U.R.  
DAL FRIÛL VIGNESIE JULIE 22 FEVRÂR 2006 N° 8  
INVIÂT AE DIREZION REGJONÂL AUTONOMIIS LOCÂLS PAL INSERIMENT  
TAL SÎT INFORMATIC ISTITUZIONÂL DE REGJON

INSERÎT TE RACUELTE UFICIÂL DAI STATÛTS

**IL SINDIC - GINO GREGORIS**

**IL SEGRETARI COMUNÂL - OLIVIERI DOTT. TOMMASO**